

ԱՐՁԱՆԱԳՐՈՒԹՅՈՒՆ N10 -ՀԽ

ՀՀ բնապահպանության նախարարին կից հասարակական խորհրդի նիստի

28.06.2017թ

ք.Երևան

Ժամը 17³⁰

ՄԱՍՆԱԿՑՈՒՄ ԷԻՆ

Ա.Մինասյան ՀՀ բնապահպանության նախարար-խորհրդի նախագահ

ԽՈՐՀՐԴԻ ԱՆԴԱՄՆԵՐ

- | | |
|------------------|---|
| Կ. Դանիելյան | «Հանուն մարդկային կայուն զարգացման ասոցիացիան» ՀԿ |
| Վ. Հակոբյան | «Դեմետրա-Էկո» բնապահպանական-գյուղատնտեսական ՀԿ նախագահ |
| Ա. Իսկոյան | «Շրջակա միջավայրի պահպանության իրավական կենտրոն» ՀԿ |
| Ա. Միրզոյան | «Սպառողների աջակցման կենտրոն» ՀԿ |
| Ս. Այվազյան | Երևանի Օրհուս կենտրոնի համակարգող |
| Գ. Օգանեզովա | «Հայկական բուսաբանական ընկերություն» ՀԿ |
| Ի. Զարաֆյան | «Էկոլուր» տեղեկատվական ՀԿ |
| Գ. Ալոյան | «Հայաստանի արդյունաբերողների և գործարարների միություն» |
| Ս. Ադամյան | «Էկոլոգիական հասարակական միություն» ՀԿ |
| Հ. Սանասարյան | «Հայաստանի կանաչների միություն» ՀԿ |
| Ա. Համբարձումյան | «Հասարակական ծայն» ՀԿ |
| Ա. Վարդանյան | ՀՀ բնապահպանության նախարարության աշխատակազմի տեղեկատվության և հասարակայնության հետ կապերի վարչության պետ: |

ՕՐԱԿԱՐԳՈՒՄ

Հարց 1.

ՀՀ բնապահպանության նախարարությունում իրականացվելիք բարեփոխումների թիրախները

Հարց.2

Նորմատիվ իրավական ակտերի վերաբերյալ հանրային լսումներ անցկացնելու անհրաժեշտությունը

Հարց.3

ՀՀ բույսերի կարմիր գրքում գրանցված բույսերի նոր բնակավայրերը հատուկ պահպանվող տարածքների ցանկում ընդգրկելու հարցը

Հարց.4

ՀՀ ոստիկանությունում բնապահպանական ոստիկանության ստեղծման հնարավորությունները

Ելույթով հանդես եկավ Ա. Մինասյանը-Ներկայացրեց ՀՀ բնապահպանության նախարարությունում իրականացվող բարեփոխումների թիրախները: Նշեց, որ գերատեսչությունը ղեկավարելու կարճ ժամանակահատվածում ոլորտի խնդիրների ախտորոշումը, ինչպես նաև հասարակական կազմակերպությունների և մասնագետների հետ քննարկումները հանգեցրել են նախարարության գործառույթների վերանայման անհրաժեշտությանը և համապատասխան առաջարկները ներկայացվել են ՀՀ Նախագահին ու վարչապետին: Տեղեկացրեց, որ միասնական բնապահպանական քաղաքականությունն իրականացվելու է յոթ հիմնական գործառույթներով: Առաջին՝ բնական ռեսուրսների /սպառվող և չսպառվող/ հաշվառման համակարգի ձևավորումը մեկ միասնական հարթակում և դրա համատեքստում՝ ամբողջական առաջնային տեղեկատվության բազայի ստեղծում: Երկրորդ՝ բնական ռեսուրսների առաջարկի կառավարում /պլանավորում/, որպեսզի ցանկացած նախագիծ իրականացնողի համար որակական և քանակական սահմանափակումը տեսանելի լինի: Երրորդ՝ շրջակա միջավայրի վրա ազդեցության փորձաքննության նոր՝ միջազգային համակարգին համապատասխանող գործառույթի ձևավորում՝ առանձին դեպքերի համար օրենքով ամրագրելով պարտադիր միջազգային փորձաքննության անհրաժեշտությունը, որպեսզի հասարակության մոտ թերահավատություն չառաջանա գործող համակարգով ձեռնարկողի հայեցողությամբ իրականացվող միջազգային փորձաքննության արդյունքների վերաբերյալ: Մեծ բնապահպանական ռիսկեր պարունակող նախագծերի համար սահմանվելու են պարտադիր միջազգային փորձաքննություններ, որոնք արվելու են ձեռնարկողի ֆինանսական միջոցների հաշվին, բայց՝ լիազոր մարմնի կողմից: Մյուս կարևոր գործառույթը՝ միասնական մոնիտորինգի համակարգի ձևավորումն է: Շրջակա միջավայրի պահպանության և վերականգնման գործառույթի շրջանակներում դիտարկվելու են, ոչ միայն կառավարման պլանները, այլև շրջակա միջավայրի վերականգնողական և տարբեր բնական ռեսուրսների անհամաչափությունները վերացնելու և այն բնականոն զարգացման հարթություն տեղափոխելու միջոցառումները: Կարևորեց էկոլոգիայի և դաստիարակության գործառույթը, որը վերաբերում է հասարակության տարիքային բոլոր խմբերին՝ մանկահասակ տարիքից մինչև ավագ սերունդ, անկախ գործունեության ոլորտից և այս ուղղությամբ ներդրվելու են բոլոր հնարավոր միջոցները:

Բարեփոխումների շրջանակներում կձևավորվեն նաև նախարարության գործառույթների իրականացման այնպիսի մեխանիզմներ, որոնք արդյունավետ կգործի՝ անկախ նրանից, թե տվյալ ժամանակահատվածում ովքեր կլինեն այն իրականացնողները:

Անդրադարձավ նաև իրականացվելիք կադրային և կառուցվածքային արմատական վերանայումներին՝ նշելով, որ գերատեսչությունում աշխատելու հնարավորություն կունենան այն մասնագետները, որոնք կբավարարեն երեք չափանիշի՝ հայրենասիրություն, պատասխանատվություն և պրոֆեսիոնալիզմ:

Ելույթով հանդես եկավ Վ. Հակոբյանը-Ներկայացրեց ՀՀ կարմիր գրքում գրանցված բույսերի նոր բնակատեղիները՝ հատուկ պահպանման ռեժիմի ներքո ընդգրկելու առաջարկը: Մատուցեց հասարակական կազմակերպության երկու տարվա ուսումնասիրությունների արդյունքները, ըստ որի կարմիրգրքային բույսերի հայտնաբերված նոր բնակատեղիները պաշտպանված չեն և ենթարկվում են անտրոպոգեն ազդեցության: Հազվագյուտ բուսատեսակների տարածման վայրերը պահպանելու համար առաջարկվեց գործող իրավական դաշտի հիման վրա սահմանել պահպանման համապատասխան ռեժիմ:

Առաջարկով հանդես եկավ Ա. Մինասյանը-Առաջարկեց ուսումնասիրությունների արդյունքները քննարկել Կենսառեսուրսների կառավարման գործակալության հետ և ներկայացնել համապատասխան լուծումներ:

Ելույթով հանդես եկավ Լ. Թասալյանը- Առաջարկեց քննարկել բնապահպանական ոստիկանության ձևավորման մեխանիզմները:

Պարզաբանմամբ հանդես եկավ Ա. Մինասյանը- Տեղեկացրեց, որ ՀՀ կառավարության նախաձեռնած տեսչական բարեփոխումների գործընթացն իրականացման փուլում է և առաջարկեց ներկայացված մոտեցումները դիտարկել նախատեսվող բարեփոխումների շրջանակում: Նշեց, որ կուժեղացվի տեսչության կանխարգելիչ գործառույթը և տեսուչները 24-ժամյա ռեժիմով աշխատելու իրավունք կունենան: Կձևավորվի նաև վարձատրության և խրախուսման համակարգ, ինչը կնպաստի կոռուպցիոն ռիսկերի նվազեցմանը:

Որոշվեց

Լ. Թասալյանի զեկույցում ներկայացված մոտեցումները դիտարկել տեսչական բարեփոխումների շրջանակներում անցկացվող քննարկումների ժամանակ:

ԽՈՐՀՐԴԻ ՆԱԽԱԳԱՀ



Ա. ՄԻՆԱՍՅԱՆ

Արձանագրեց
Ա.Վարդանյանը